

Nunatsinni inuutissarsiutit pingaarnersaanni, aalisarnermi, niueruteqarnermi aningaasat ingerlaarnerat pillugu misissueqqissaarnissaq siunertaralugu isumalioqatigiissitamik pilersitsisoqarnissamik Naalakkersuisut suliniuteqaleqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Karl Lyberth, Siumut)

Iluarsiissut

(kalaallisuuani oqaatsit ilaannik iluarsiineq)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeenera

Inatsisartunut ilaasortap Karl Lyberthip siunnersuutigaa, nunatsinni aalisarnermik inuussutissarsiummi tunisassiat niuerutigineqartarnerini aningaasat ingerlaarnerat pillugu misissueqqissaarnissaq siunertaralugu isumalioqatigiissitamik pilersitsisoqarnissaanik Naalakkersuisut suliniuteqassasut. Tassunga tunngatillugu ilisimatitsissutigisinnaavara nunatsinni avataasiorluni raajarniarneq pillugu 2011-imi taamatut misissueqqissaartoqarnikummat. Misissueqqissaarnermit nalunaarusiaq Inatsisartunut ataatsimiititalianullu susassaqtunut 23. juni 2011 agguaanneqarpoq. Raajat tunineqarnerminni akigisartagaat nunarsuaq tamakkerlugu niuernermi akigitinneqartartoq tunngavigineraa misissueqqissaarnermi ersissinniarneqarpoq. Misissueqqissaarneq ingerlanneqarpoq kukkunersiuusunit naalagaaffimmit akuerisanit Namminersorlutik Oqartussat aalisarnermillu inuussutissarsiuteqartut aallartitaat suleqatigalugit.

Misissueqqissaarnermi siuliani taaneqartumi paasineqarpoq aalisariutaatileqatigiit Danmarkimi ingerlatseqatigiiffinnik immikkoortortallit raajanik qalerualinnik nunatta avataannut tunisaqartarnerminni akigitittagaat nunarsuaq tamakkerlugu niuernermi akigitinneqartartunit appasinneraaneq tunngavissaqanngitsoq. Allatut oqaatigalugu tunisinerni akigitinneqartartut nunarsuaq tamakkerlugu niuernerne atugassarititaasut aallaavigalugit aalajangersarneqartarput.

Ilanngullugu oqaatigisariaqarpoq misissueqqissaanerup takutikkaa tunisinerne akigititat annertussusaanut apeqqutaasartoq tulaassineq Kalaallit Nunaanni Ålborgimiluunniit pinersoq. Tassaniami peqqutaasoq ersarilluinnarpoq, tassalu assartuisarnerne aningaasartuutit akilerneqartarnerat assigiinngitsuni pisarmat. Taamatut akiliisarnerne assigiinngissutsit raajanut akitsuummumt sunniuteqarsinnaapput, taamaallunilu inuiaqatigiit kalaallit pisuussutiminnit pissarsissutigisartagaat sunnerneqartarlutik. Misissueqqissaarneq inerneraa raajat akitsuutaasa akilerneqartarnerat eqqarsaatigalugu sumi tunisisoqartarnera aningaasat eqqarsaatigalugit pingaaruteqarpallaanngitsoq.

Qulaani misissueqqissaanerup inernilerneqarsimaneranut atatillugu ilisimatitsisutigisinnaavara ukiaq manna Inatsisartut ataatsimiinneranni Naalakkersuisut

raajanut akitsuutit allangortinnissaannut siunnersuuteqassamaarmata, tassa immikkoortoq UKA 2011-110: Raajanut akitsuutit pillugit Inatsisartut inatsisaata allangortinnissaa.

Naggataatigut ilisimatitsissutigissavara qaleralinniarnermi aningaasaqarneq pillugu Naalakkersuisut siuliani pineqartup assinganik misissueqqissaartitsinissamik pilersaaruteqarmata. Tassungalu atatillugu aallaqqaatitut suliniutit aallarteerput, inuussutissarsiuteqartullu suliamut ilaatinneqarnissaanut qaaqquneqarumaarlutik.

Qulaani oqaatigineqartut tunngavigalugit matumuuna Naalakkersuisut inassutigissavaat aalajangiiffissatut siunnersuut ilalernerqassanngitsoq aalajangigassatullu siunnersuutip itigartitsissutigineqarnissaa inassutigineqarluni.